

# La'ó Hamutuk

Institutu Timor-Leste ba Monitor no Analiza Dezenvolvimentu

Rua Dom Alberto Ricardo, Bebora, Dili, Timor-Leste

Tel: +670-3321040 or +670-77234330 (mobile) email: laohamutuk@gmail.com

Website: [www.laohamutuk.org](http://www.laohamutuk.org)



Dili, 9 Abril 2020

**Bodik ba: Ex<sup>mo</sup> Primeiru Ministru RDTL, Sr.Taur Matan Ruak**

**Asuntu: Kestaun Ekonomia no Prioridade ba COVID 19**

*Ho respeito,*

La'ó Hamutuk durante ne'e observa servisu Governu nian, no hakarak kongratula komitmentu hodi estabelese sistema prevensaun no protesauun ba COVID-19. Ami mós observa katak foin lalais Parlamentu Nasionál promulga ona Pakote tokon \$150 husi Ministériu Finansas kona-bá resposta COVID-19 no ekonomia. Ami apresia medida hirak ne'ebé Governu foti tiha ona hanesan estabelese Estadu Emerjénsia, kriaun ekipa tékniku saúde *Covid task force*, fornese sentru fase liman iha fatin públiku sira no hasa'e koñesimentu públiku kona-ba moras COVID-19.

Liu husi karta ida ne'e, ami hakarak hato'o ami nia observaun no komentáriu kona-ba pakote alokasaun husi Ministériu Finansas nian, alende ne'e, ami mós hakarak fó sujestaun atu hadi'ak liután iha futuru, liuliu prioritiza sira ne'ebé vulnerável no presiza liu tulun, asegura katak sira ne'ebé vulnerável liu la sai vítima ba presauun ekonómiku.

Hafoin ami simu dokumentu pakote husi Ministériu Finansas nian kona-bá resposta COVID-19 no ekonomia ne'ebé hatama ba Komisaun C Parlamentu Nasionál iha 30 Marsu 2020. La'ó Hamutuk halo analiza, no ami deskobre katak:

1. Pakote ne'e seidak iha elaborasaun ne'ebé konkretu, no seidak iha esplikasaun kle'an kona ba oinsá orsamentu hirak ne'e sei aloka liuliu ba grupu vulneravel sira.
2. Pakote refere fornese de'it montante tokon \$36 ba grupu vulnerável sira, maibé oferese tokon \$50 ba entidade privadu sira hanesan banku no emprefáriu sira.
3. Pakote ne'e seidak esplika klaru ba meius prosesu fornese osan, fahe hahán no aimoruk ba grupu vulnerável sira, no seidak esplika loloos se mak tama kategoria hanesan grupu vulnerável.

Hafoin halo analiza La'ó Hamutuk iha sujestaun balun ba Sua Exelénsia hodi konsidera. Ami rekoñese no toma nota katak, tempu atu halo mudansa ba pakote ida ne'e liu tiha ona, maibé karik ba pakote tuir mai ne'ebé prepara husi Ministériu Finansas bele iha liu informasaun no prioridade detallu bazeia ba situaun ne'ebé Timor-Leste hasoru.

Ami nia sujestaun prinsipál mak hanesan tuir mai ne'e:

1. Tuir La'ó Hamutuk, Governu presiza prioritiza asisténsia ba grupu vulneraveis sira liuliu asisténsia ekonómika labele haree de'it ba setór formal ka emprefáriu privadu

iha Dili. Ho razaun katak, maioria uma-kain iha Timor-Leste depende husi setór informal hanesan; (kios, vendedor ambulante, vendedor modo-tahan fresku iha merkadu sira, vendedor ai-leba, taxistas, kondutór mikrolet sira, toos-na'in sira, traballadóra doméstika sira, peskadór sira, estudante, dezempregu sira, mekániku iha bengkel sira, no ema hotu ne'ebé tama kategoria la simu rendimentu formál). Hanesan ita hotu hatene, husi total idade produtivu iha Timor-Leste menus husi 20% de'it mak servisu iha setór formál (inklui ema hotu ne'ebé hetan saláriu no selu taxa – sira ne'ebé servisu ba ONG sira, sosiedade sivíl, instituisaun internasionál no nasional, igreja, eskola privada sira, no banku sira). Governu presiza fornese asisténsia adekuaudu atu sira bele sobrevive iha situasaun ida ne'e, maibé se karik fó subsidiu ba traballadór sira ne'ebé rejistu tiha ona ho sistema seguransa sosiál, ne'e katak traballadór sira iha setór informal sei la hetan benefísiu. Atu asegura katak asisténsia ne'ebé governu fornese la hamosu diskriminasaun bazeia ba status formal ka naunformal, ami rekomenda atu fornese asisténsia finansas ba ema hotu.

Se Governu labele kontrola presu sira, La'ó Hamutuk sujere lista ai-han esensiál sira no sabaun fase liman no distribui kada bairu. Tuir La'ó Hamutuk, presiza hakbiit no kolabora metin ho lideransa xefe aldeia no xefe suku sira atu bele servisu no fahe hahán no montante finansiál hanesan ba kada família hotu iha Timor-Leste. Alende servisu hamutuk ho lideransa iha aldeia ne'e bele hafasil prosesu fahe hahán no fahe pakote finansiál liuliu. Hahán hirak ne'ebé atu fahe bele sosa fali husi ita nia agrikultór sira, hanesan koto, fore-keli, fore-mungu, atu nune'e iha tempu naruk bele promove soberania ai-han iha rai laran, no hamenus importasaun.

2. Bazeia ba pakote Ministériu Finansas nian kona-bá resposta COVID-19 no ekonomia, alokasaun ba setór privadu boot liu fali asisténsia ba ema kbiit laek sira. Tuir ami nia observasaun Banku Dezenvolvimentu Ázia no Banku Mundiál anunsia ona sira nia fundu hodi asiste Governu atu estabelese meus servisu no asegura emprezáriu setór privadu sira labele taka durante krize COVID-19. Maibé atu fó hanoin katak, pakote asisténsia ne'ebé sei mai husi Instituisaun Finansiál Internasionál hirak ne'e, la'ós gratuita maibé nu'udar deve (Empréstimu ho Kondisaun preferénsia sira) ida ne'ebé presiza selu fila fali iha futuru. Uza fundu hirak ne'e atu fornese solusaun ba ekonomia Timor-Leste durante krize COVID-19, tuir La'ó Hamutuk meus ida ne'e la'ós solusaun ida sustentável no la efektivu. Se karik Governu deside atu empresta osan atu hasoru impaktu ekonómiku husi COVID-19, presiza uza fundus ne'e atu suporta no hametin ekonomia povu nian (inklui setór informal), depois de krize ida ne'e kompañia boot iha setór formal la hetan vantajen kompara ho setór informal no produsaun lokal.
3. Asuntu importante liu mak oinsá maioria populasaun hela iha área rural bele kontinua moris. Liu 80% ema moris iha área rural no 64% husi ne'e moris hanesan agrikultór subsistensia. Atu nota mós katak persentajen ema ne'ebé hanesan, sira nia saúde frajil tebes durante ne'e. Tanba sofre husi nutrisaun ne'ebé insuficiente, frakeza iha pulmaun hanesan TBC no moras seluk ne'ebé mosu tanba te'in hahán la uza ventilasaun apropiadu. Atu nota mós katak, ho medida Governu nian katak, ema hotu tenke hela iha uma atu hamenus risku COVID-19, risku violénsia doméstika mós aumenta. Ami sujere kria grupu inter-ministerial hodi haree ba asuntu asisténsia ba grupu vulnerável sira durante krize ida ne'e.

4. Solusaun hodi fornese asisténsia ba setór privadu ka kompañia sira tuir La'ó Hamutuk prezisa halo monitorizasaun ida rigorozu katak asisténsia sira ne'e sei uza hodi selu servisu na'in sira ne'ebé lakon sira nia saláriu tanba krize COVID-19 no la'ós atu hariku emperezáriu nia na'in sira. Populasaun Timor-Leste ne'ebé servisu ba kompañia privadu sira konstitui de'it husi 6.6% husi populasaun ho idade atu servisu, no maioria konsentra iha Dili.
5. Ami enkoraja atu membru Governu, bloku opozisaun sira hotu, deputadu/a no lideransa polítika hot-hotu atu tau interese partidáriu nian iha kotuk hodi foka atensaun oinsá prevene no proteje sidadaun hotu iha Timor-Leste. Tau matan no kontinua mantén nafatin sistema transparénsia no direitu umanu.

Ikus liu, La'ó Hamutuk apresia ba servisu no esforsu tomak governu nian ne'ebé hatudu ona durante ne'e ho lideransa no kometimentu rigorozu hodi hasoru pandemia COVID-19 iha Timor-Leste, ami hakarak fó nafatin korajen atu ita boot sira kontinua servisu di'ak sira ne'e atu hamenus risku no proteje ba povu nia moris iha momentu ida ne'e.

Ba Sua Exelénsia nia atensaun no disponibilidade ba hasoru ami, la haluha ami hato'o obrigadu barak.

Ami mak saran lia,



Adilsonio da Costa Junior      Marta da Silva,  
**Ekipa Koordenadór La'ó Hamutuk**

**Kopia ba :**

- Ex<sup>mo</sup> Prezidente da Repúblika, Sr. Francisco Guterres “Lú Olo”
- Ex<sup>mo</sup> Prezidente Parlamentu Nasional, Sr. Arão Noé
- Ex<sup>ma</sup> Ministra Finansas em exercisio, Sra. Sara Lobo Brites
- Ex<sup>mo</sup> Ministru MCAE em exercisio, Sr. Fidelis Magalhães
- Ekipa Jestaun Risku Covid-19
- Media no Públiku